

Kun ngunyan an huring aldaw kan saimong buhay, saen ka maduman?

Alagad dai nindo aram kun ano an mangyayari
sa aga. Ta ano an saimong buhay? Ini sarong
alisngaw, na minalataw sa kadikit na panahon,
dangan nawawara. Santiago 4:14



Igwa nin apat na katotoohan na dapat tang lubos na masabutan:

1. Namomotan kang marhay nin Dios.

Gusto Niya na magkaigwa ka nin buhay na daing katapusan sa langit kaiba Niya.

Huli ta namotan nin Dios an kinaban, kaya itinao niya an saiyang bugtong na Aki, tanganing an siisay man na magtubod saiya dai mapahamak kundi magkaigwa nin buhay na daing kataposan. Juan 3:16
Gusto Niya na magkaigwa ka nin abunda asin makahulugan na buhay kaiba Niya.

An mahabon dai minadigdi kundi sa paghabon, asin sa paggadan, asin sa paglaglag. Ako napadigdi tanganing sinda magkaigwa nin buhay, asin tanganing sinda magkaigwa kaiyan nin labi-labi. Juan 10:10

Sa ibong kaini, dakol na tawo an dai nakakaeksperyensya nin makahulugan na buhay asin dai sigurado kun igwa sinda nin buhay na daing kasagkoran nin huli ta...

2. An tawo makasalan sa naturalesa. Kaya ngani siblag siya sa Diyos.

An gabos nagkasala.

Huli ta an gabos nagkasala, asin nagkulang sa kamurawayan nin diyos;
Mga Taga Roma 3:23

Huli ta an pagkamoot sa pirak iyo an gamot kan gabos na karatan...

1 Timoteo 6:10

An bayad nin kasalan iyo an kagadanan.

Huli ta an bayad nin kasalan iyo an kagadanan... Roma 6:23

An Biblia nagsasabi nin duwang klase nin kagadanan:

- Pisikal na kagadanan

Asin siring na itinalaga sa mga tawo na magadan nin sarong beses, asin pakatapos kaini an paghokom: Hebreo 9:27

- Espirituwal na kagadanan o daing sagkod na pagkasuhay sa Dios sa impiyerno

Alagad an mga matakot, asin an dai nagtutubod, asin an makauuyam, asin an mga paragadan, asin an mga parasambay, asin an mga salamangkero, asin an mga parasamba sa dios-dios, asin an gabos na putikon, mapapaduman sa danaw na naglalaad nin kalayo asin asupre: na iyo an ikaduwang kagadanan. Kapahayagan 21:8

Kun an tawo siblag sa Dios huli kan saiyang kasalan, ano an solusyon sa problemang ini? Parati tang iniisip na an mga solusyon iyo an: relihiyon, marhay na gibo, asin marhay na ugali. Alagad saro sana an solusyon hale sa Dios.

3. Si Jesukristo sana an dalan pasiring sa langit.

Ini an deklarasyon nin Dios.

Si Jesus nagsabi saiya, Ako iyo an dalan, an katotoohan, asin an buhay. Mayo nin siisay man na makakadolok sa Ama kun dai sa paagi ko. Juan 14:6

Binayadan niya an bilog na padusa para sa satong mga kasalan. Huli ta si Cristo man nagadan nin sarong beses para sa mga kasalan, an matanos para sa mga bakong matanos, tanganing darahon niya kita sa Dios, na ginadan sa laman, alagad binuhay kan espiritu: 1 Pedro 3:18

Sa paagi kan saiyang dugo, ilinigtas kita kan satong mga kasalan, siring sa kadakulan kan saiyang biyaya; Efeso 1:7

Igwa siya kan panuga nin buhay na daing katapusan.

An minatubod sa Aki igwa nin buhay na daing kataposan: alagad an dai minatubod sa Aki dai makakahiling nin buhay; alagad an kaanggotan nin Dios nagdadanay sa saiya. Juan 3:36

Huli ta an bayad nin kasalan iyo an kagadanan; alagad an balaog nin Dios iyo an buhay na daing kataposan dian ki Jesu-Cristo na satong Kagurangnan. Mga Taga Roma 6:23

4. Kaipuhan kitang magtubod ki Jesukristo tanganing maligtas.

An satong kaligtasan huli sa biyaya nin Dios sa paagi kan pagtubod ki Jesukristo.

Huli ta huli sa biyaya kamo naligtas huli sa pagtubod; asin iyan bakong gikan sa saindo man sana: iyan balaog nin Dios: bakong gikan sa magña guibo, tagñaning dai nin siisay man na maghambog. Efeso 2:8-9

Huli ta an siisay man na mag-apod sa ngaran nin Kagurangnan makakaligtas. Mga Taga Roma 10:13

Pamibi nin Parakasala

Ipamibi ini na may pagtubod:

Kagurangnan Jesus, salamat na marhay sa pagkamoot mo sako.

Nagkukumpisal ako na ako sarong parakasala asin hinahagad ko an saimong kapatawadan. Salamat sa saimong pagkagadan sa krus, paglubong, asin pagkabuhay-liwat tanganing bayadan an gabos kong kasalan. Nagtitiwala ako saimo bilang sakuyang Kagurangnan asin Paraligtas. Inaako ko an saimong balaog na buhay na daing kasagkoran asin isinusuko ko an sakuyang buhay saimo. Tabangan mo akong kuyogon an gabos mong pagboot asin magin nakakapaogma sa saimong paghiling. Amen.

Kun nagtiwala ka ki Jesu-Cristo, nangyari saimo an minasunod:

- Ngonian, igwa ka nin buhay na daing katapusan sa Dios.

Asin ini an kabotan kan nagsugo sako, na an lambang makahiling sa Aki asin minatubod saiya, magkamit nin buhay na daing kataposan, asin bubuhayon ko siya liwat sa huring aldaw. Juan 6:40

- An gabos mong kasalan binayaran asin pinatawad na.

(nakaagi, presente, maabot)

Alagad si Jesus, pakatapos na magdolot nin sarong sakripisyo para sa mga kasalan sagkod lamang, nagtukaw sa too nin Dios;

Mga Hebreo 10:12

- Bagong linalang kamo sa pagheling nin Dios. Ini an kapinunan kan saimong bagong buhay.

Kaya kun an siisay man nasa ki Cristo, siya sarong bagong linalang: an mga daan na bagay nakalihis na; hilnga, an gabos na bagay nagin bago. 2 Corinto 5:17

- Nagin aki ka nin Dios.

Alagad an gabos na nag-ako saiya, sinda tinawan niya nin kapangyarihan na magin mga aki nin Dios, an mga nagtutubod sa saiyang ngaran: Juan 1:12

An marhay na gibo bakong paagi tanganing kita maligtas, kundi patunay o bunga kan satong kaligtasan.

Huli ta kita gibo nin Dios, linalang kita dian ki Cristo Jesus tanganing maggibo nin marahay na mga gibo, na dati nang inandam nin Dios tanganing maglakaw kita dian. Efeso 2:10

Bendisyunan ka nin diyos!